

# KERATAN AKHBAR

TARIKH : 25 JANUARI 2024

AKHBAR : SINAR HARIAN

MUKA SURAT : 29

## OPR kekal 3.00 peratus



OPR yang stabil bermakna kos peminjaman akan kekal tidak berubah.

# OPR kekal 3.00 peratus

Pendirian dasar monetari terus menyokong ekonomi

### KUALA LUMPUR

Jawatankuasa Dasar Monetari (MPC) Bank Negara Malaysia (BNM) memutuskan untuk mengekalkan kadar dasar semalaman (OPR) pada 3.00 peratus dalam mesyuarat pertamanya tahun ini pada Rabu.

Bank pusat itu dalam satu kenyataan berkata, pada tahap OPR semasa, pendirian dasar monetari terus menyokong ekonomi dan konsisten dengan penilaian semasa berhubung dengan prospek pertumbuhan serta inflasi.

Menurutnya, MPC tetap berwaspada terhadap perkembangan semasa bagi memaklumkan penilaian prospek inflasi dan pertumbuhan

dalam negeri.

"Pada masa sama akan memastikan pendirian dasar monetari kekal kondusif untuk pertumbuhan ekonomi yang mampan dalam keadaan harga stabil," katanya.

Tahun ini BNM menjangkakan inflasi kekal sederhana, mencerminkan secara amnya keadaan kos dan permintaan stabil walaupun risiko terhadap prospek inflasi terus sangat dipengaruhi oleh perubahan dasar dalam negeri mengenai subsidi serta kawalan harga dan perkembangan harga komoditi serta pasaran kewangan global.

Menurutnya, hasrat kerajaan untuk mengkaji semula kawalan harga dan subsidi pada 2024 akan mempengaruhi prospek keadaan inflasi serta permintaan.

Sementara itu, Ketua Ekonomi Bank Muamalat Malaysia Bhd, Dr Mohd Afzanizam Abdul Rashid berkata, keputusan BNM untuk mengekalkan OPR adalah dijangkakan.

Beliau yakin dengan langkah itu kadar faedah penanda aras mungkin

akan kekal pada 3.00 peratus dalam tempoh terdekat.

Menurutnya, ia dengan mengandaikan ekonomi akan bertambah baik tahun ini walaupun berlaku ketidakpastian inflasi yang bergantung kepada rasionalisasi subsidi dan langkah kawalan harga.

"Secara keseluruhan kami berpendapat dasar monetari berada pada zon terhad dengan kadar faedah sebenar berada pada 1.5 peratus berbanding purata jangka panjang 0.6 peratus," katanya.

Mohd Afzanizam berkata, OPR yang stabil juga bermakna kos peminjaman akan kekal tidak berubah.

Tambah beliau, ia membolehkan isi rumah dan perniagaan membuat perancangan lebih baik jika mereka memutuskan untuk menilai semula struktur liabiliti.

"Mereka boleh memilih membiayai semula liabiliti mereka terutama apabila mengambil pembiayaan semasa kadar faedah berada pada trajektori lebih tinggi," katanya. - Bernama